

ЖҰБАТУ

Әлди-әлди, ақ бөпем,
Ақ бесікке жат, бөпем.
Құнан қойды сой, бөпем,
Құйрығына той, бөпем.

Әлди-әлди, ақ бөпем,
Ақ бесікке жат, бөпем.
Бурыл тайға мін, бөпем,
Ақ қызы бар ауылда,
балпаң байдың үйіне
Бұрала барып түс, бөпем.
Қымызынан іш, бөпем,
Қымызынан бермесе,
Қызын алып қаш, бөпем.
Ашуланса ағасы,
Іштен шалып жық, бөпем.
Кекендесе жеңгесі,
Жынға басын тық, бөпем...

Әлди-әлди, апатай,
Көп жылама, қалқатай!
Әлдилесем жыламас
Ақылы көп қалқатай.
Айналайын айымыз,
Алты қарын майымыз,
Жеті қарын жентіміз,
Ташкент, Бұхар – кентіміз.
Дуай-дуай кемелім,
Күнітайым қайда екен?
Саятайым сайда екен,
Тауда неғып жүр екен?
Алма теріп жүр екен.
Алмасынан қанеки?
Жаңа теріп жүр екен.
Жаңасынан қанеки?
Жаңа барып жүр екен.